



KERAJAAN NEGERI KELANTAN

PEKELILING PERKHIDMATAN NEGERI KELANTAN BILANGAN 4 TAHUN 2015

PELANTIKAN SECARA BERELAUN KAKITANGAN SAMBILAN KUMPULAN SOKONGAN YANG TELAH BERKHIDMAT TIGA (3) TAHUN ATAU LEBIH

TUJUAN

1. Pekeliling Perkhidmatan ini dikeluarkan bagi memaklumkan kepada semua Ketua Jabatan Kerajaan Negeri, Ketua Pengurusan Badan Berkanun Negeri dan Ketua Pengurusan Pihak Berkuasa Tempatan Negeri berkenaan keputusan Majlis Mesyuarat Kerajaan Negeri yang bersidang pada 01 April 2015, kertas Majlis Mesyuarat Kerajaan Bilangan 7/2015/D 8 (99) mengenai pelantikan secara berelaun kakitangan sambilan Kumpulan Sokongan yang telah berkhidmat tiga (3) tahun atau lebih.

LATARBELAKANG

2. Pada tahun 2011, Kerajaan Negeri telah bersetuju supaya kakitangan sambilan yang telah berkhidmat lima (5) tahun atau lebih boleh dipertimbangkan untuk dilantik secara berelaun dengan diberi gaji secara pukal (Lump sum) mengikut kategori masing-masing dengan syarat markah Laporan Nilai Prestasi Tahunan adalah 80% ke atas serta mendapat sokongan Ketua Jabatan/Ketua Unit masing-masing sebagaimana Surat Pekeliling Perkhidmatan Negeri Bilangan 1 Tahun 2011.

3. Memandangkan tempoh lima (5) tahun yang diamalkan sekarang adalah agak lama dan sangat membebankan para pekerja sambilan, maka kerajaan telah bersetuju untuk membuat penambahbaikan dengan memendekkan tempoh untuk dilantik secara berelaun.
4. Perubahan tempoh pelantikan secara berelaun ini diharap dapat memberi motivasi serta galakan kepada anggota untuk berkhidmat dengan lebih cemerlang.

PELAKSANAAN

5. Kerajaan telah bersetuju, kakitangan sambilan yang telah berkhidmat tiga (3) tahun atau lebih boleh dipertimbangkan untuk dilantik secara berelaun dengan diberi gaji secara pukal (Lump sum) mengikut skim perkhidmatan yang berkenaan dan memenuhi syarat-syarat kelayakan lantikan ke skim perkhidmatan yang sedang berkuatkuasa. Markah Laporan Nilai Prestasi Tahunan adalah 85% ke atas serta mendapat sokongan Ketua Jabatan/Ketua Unit masing-masing.
6. Permohonan yang lengkap dan memenuhi syarat-syarat sebagaimana di para 5 hendaklah dikemukakan kepada Yang Berhormat Dato' Setiausaha Kerajaan Negeri Kelantan melalui Ketua Jabatan/Ketua Unit masing-masing.
7. Tarikh pelantikan ke jawatan berelaun hendaklah selepas tempoh tiga (3) tahun berkhidmat atau lebih di jawatan sambilan dan tarikh pelantikan tidak boleh dikebelakangkan.

PEMAKAIAN

8. Tertakluk kepada penerimaannya oleh Pihak Berkuasa masing-masing, peruntukan Pekeliling Perkhidmatan ini pada keseluruhannya dipanjangkan kepada semua Pihak Berkuasa Berkanun Negeri dan Pihak Berkuasa Tempatan Negeri.

TARIKH KUAT KUASA

9. Pekeliling Perkhidmatan ini berkuat kuasa mulai **01 April 2015**.

PEMBATALAN

10. Dengan berkuatkuasanya Pekeliling Perkhidmatan ini, maka Surat Pekeliling Perkhidmatan Negeri Kelantan Bilangan 1 Tahun 2011 adalah dibatalkan.

"SYARIAT DIPATUHI, RAJA DIHORMATI, RAKYAT DILINDUNGI"



(HAJI ADNAN BIN HUSSIN)

Timbalan Setiausaha Kerajaan (Pengurusan)

b.p. SETIAUSAHA KERAJAAN

NEGERI KELANTAN

Pejabat Setiausaha Kerajaan Negeri Kelantan
Bahagian Pengurusan Sumber Manusia
Blok 2, Aras 2, Kota Darulnaim
15503 KOTA BHARU.

Bertarikh : 10 Rejab 1436
29 April 2015

[SUK.D.200(01)600/9 JLD.11 (23)]

Kepada : Semua Ketua Jabatan Negeri

Salinan kepada : Ketua Pengurusan
Pihak Berkuasa Tempatan Negeri

Ketua Pengurusan
Pihak Berkuasa Berkanun Negeri